

միածին: Անոր հոն անցուցած կեանքի մասին կը պակ-
սին տեղեկութիւններ: Մինաս Ամգեցի, որ Եղիազարի
օրով ապրած է էջմիածին նախ՝ 1682 Օգոս. 27 - Նոյ.
7, երկրորդ՝ 1685 Յուլիս 2 - Նոյ. 3 և երրորդ՝ 1688
Մարտ 10 - 1690 Յունիս 2, իր Օրագրութեան մէջ չի
յիշեր Գրիգորի վարդապետի անունը: Անգամ մը մի-
այն, 1690 Փետր. 6ին, կ'արձանագրէ. «Ժամ եկաւ
Վեհն (Եղիազար) և Գ արեզայի իշխանութիւն ետ՝
Ովասափին, Պետրոսին եւ Գրիգորին» (թղ. 130ա):
Այստեղ յիշուած Գրիգոր արեղան անկասկած է՝ նոյն
ինքն Գրիգորի Քէօմիւրճեան: Ամգեցի ամէն անգամ
Գրիգոր վարդապետ կ'անուանէ զայն:

Հատորիս Յաւելուածին մէջ (էջ 574) զետեղած
ենք Երեմիայի երկու փոքրիկ ուղերձները, բաղկա-
ցած՝ մէկը տասը և միւսը վեց տողերէ: Ատոնցմէ կը
յայտնուի թէ ան Ջուղայեցի խոճայի մը միջոցաւ Կ.
Պոլսէն աւանդ (ամանաթ) մը ղրկած է էջմիածին իր
կրօնաւոր զաւակին.

«Երեմիայի որդի կոչեալ Տէր Գրիգորիս,
Որ կայ ի սպաս հայրապետին հանուրց ազգիս:
Ո՛վ դու խօճայ զայս ամանաթ պահել պարտիս,
Ամբողջ առ այն հասուցանել ըզհոգ տանիս»:

Եղիազար կաթողիկոսի կեանքի վերջին օրերուն
Գրիգորիս վրդ. վերջնականապէս կը հեռանայ էջմիա-
ծինէն: Իր մեկնելու օրը Հայրապետը կու տայ անոր
իր հուսկ օրհնութիւնը ու կը յանձնէ նամակ մը իր Զէ-
լէպի հօր ուղղուած, ու ան Ս. Ծննդեան պահոց առա-
ջին օրը կը հասնի Կ. Պոլիս (Յաւել. էջ 479): Եղիա-
զար մասնաւոր կոնդակով մը անոր տուած էր իրա-
ւունք վարդապետական գաւազանին հետ կրելու նաև
Թագ և եմիփորոն: Գրիգորիս վրդ. Ս. Ծննդեան պա-
հոց երկրորդ օրը (31 Դեկտ.) իր հօրը հետ միասին